



166 781

QUÆSTIO MEDICA

QUOD LIBETARIIS DISPUTATIONIBUS

MANE DISCUTIENDA

IN SCHOLIS MEDICORUM.

Die Jovis 12. Novembris.

M. JOANNE ROBERT

DOCTORE MEDICO PRÆSIDE.

An instante februm exandescentiâ, accessione, purgandum?

I.

FEBRIS, vulgare maximè morbi genus, calor est igneus præter naturam in corde, quod nativi fons est, tanquam in propriâ sede accensus, ab eoque per arteriarum tubos quoquoaversum sparsus. Hic omnes, quarum ille author est, functiones lædit, aliàs levius, aliàs atrocius. Nunc enim fervor, unde morbo nomen, ingens est; nunc tolerabilis: nonnunquam eodem quo exarsit die sopitur, nonnunquam in plures porrigitur. Et quæ diu malè habet febris, nunc continuum tenorem obtinet, nec ante minuitur, quàm sit profus extincta; nunc sine integritate liberaliter remittit, rursusque intenditur: nunc ex toto intermittit, statisque accessionum atque decessionum vicibus redit, ac desinit, quartâ, terciâ, alterâ quâque luce: modò accessiones singulæ, singulis diebus fiunt; modò binæ, pluresve concurrunt, unaquaque priorî respondente. Interdum verò sic confunduntur; ut febris videatur informis & inordinata, notarique neque earum tempora, neque spacia possint. Est & ubi penè sola viget; est ubi sub ea dolet caput, premit

somnus, tumultuosa sunt somnia, oculi cum dolore vertuntur, aspera est lingua, difficilis spiritus, intenta præcordia, loqui piget, cruciat sitis, cibum non continet stomachus, fluit alvus, membra inhorrescunt, corpus lassitudinem sentit, jactatur, sudore digeritur.

I I.

QUEMADMODUM in epilepsia, cerebrum; sic in febre, cor afficitur; ut illa nusquam sit, nisi hoc æstuet. Suscitatus igitur in corde primum æstus, legitimam & primariam facit febrem; aliunde adveniens, notham quàmque vocant symptomaticam, modò continenter, modò ex intervallis tantùm vexantem; nec semper ideo securam periculi. Cùm peregrinus calor imis validissimi visceris medullis insedit altissimè, sit febris hæctica primariorum perniciosissima. Reliquarum sive assiduarum, sive interpolatarum causa humor est flagrans, plerumque alienus, cordis sinubus, vel ei vicinis majoribus vasis inclusus, qui sæpius fervet, ebullit, aduritur; raro cotrumpitur; nunquam putrescit, quin relinquenda sit anima. Tamdium autem febris hominem devorat, quamdiu subest pabulum, quod sicubi copiosius est, spissius, viscidius, continuatur febris; si, velut ab igne stipula, citissimè, priusque absumptum est, quàm novum affluerit ad incendiij locum, febris, veluti pactis cum laborante induciis, intermittit, toties revictura, quoties è parte, unde morbi origo fecit, nova accedet seges atque materia ad colligendum ignem paratissima. Qui tamen multiformis istius febris principium certis affigunt partibus, seu Caucaso Prometheum, ventriculo scilicet Quotidianam, Tertianam jecori, Quartanam lieni, risu magis, quàm rationibus explodendi: una quippe harum omnium parens est bilis; ut plurima, quotidianam; patior, tertianam; perpauca, sed perusta, rancida, quartanam; vitellina, virens, æruginosa, sævissimam; flava, rufa, miores; pallida quæ modestior, mitissimam pariat.

I I I.

FEBRIUM non una est indoles; ubi sanguis citra putredinis labem flammatus pari usquequaque vehementiâ cor laceffit, febris nullâ exandescentiâ, nullâque intermissione infestat; ut ejus, dum integre solvatur, una sit quasi accessio; quæ si dumtaxat ad unum, ephemera; si ad plures producitur dies, dicitur *σύνετος* infrequens morbus. Præter has, incandescunt cæteræ, quod fervidior seu exspiratio, seu illuvies per patentes, occultæve vias acta, quasi turbine cor jam ardens percellat, ejusque conduplicet ignem, qui in omnes mox partes elapsus, totum corpus flammis involuit, furorisque velut effusis habenis latè vastat omnia. Inde mens ægrotantis pigrior est, aut nulla, sensus tardior, rigent aut scintillant oculi, it naribus sanguis, in vultu, unde forma recessit ac fulgor, varius errat color, aliisque ex alio fit, tacitè surgit lutea cutis, deteriusve pallor, quàm celeriter currunt venæ, tam gravis est spiritus, guttur sulphuream mephitij exhalat, fauces urit sitis, quæ somnum dat & adimit bilis, tanquam additis pennis evolet,

per os exilit, fædiore sunt sublimioris tum ventris dejectiones, urina primùm decolor, rubet; quidquid demum malorum est, in hoc tempus erumpit, nec alio mors ægros occupat: quod nisi fit, paulatim compressa humoris mutâ rabie, lux menti, vigor sensibus, laxamentumque corpori pristinum redditur. Simile quid evenit quoties sub accessionem febrium quæ certum habent circuitum, venæ solitam flammam accipiunt, notusque calor toto descendit corpore.

I V.

PRUDENS medicus febres profligaturus, Naturam morborum præcipuam expultricem, & cura omni potentio rem, quâ cessante, nihil proficitur, in rebus quas, dum sui juris est, benegerit, sedulò debet servare, ad ejusque unius leges sese componere. Hoc everso Medici Senatus edicto, sequitur artis, vitæque everasio. At illa semper febre decedente, aut disensa, crises molitur; increscente, ineunte, aut etiam appropinquante, nunquam: ut, si quid tum prodit, inauspicatò, invitatque, ac gementi excidat. Planè ut purgationis opus ad bonos ducat exitus, in una situm est temporis opportunitate, non quidem certis, & tanquam à Chaldaeo petendis diebus illigatâ; sed tum primùm sapienter captandâ, cum, quæ morbum fovet humorum lues, ab utili succo secreta posuit feritatem, seu quod idem est, quam hausit flammam. Ne igitur sit in eo perniciës, quod auxilij causa datur, considerandum quo distent accessiones, & exacerbationes, quantæ, qualesque inter eas remissiones sint, tum qualia tempora cibo leguntur, talia purgationi quoque deligenda. Ut porro omni alimento prohibetur æger, dum febris instat, augetur, ac summa est; simulatque corpus ad integritatem venit, eo cum fiducia utitur: quin satius est ejus principia à desinente febre, quàm reliquias ab incipiente excipi. Sic purgans medicamentum, ut primùm febris destitit, aut si assiduè inhæret, sese inclinavit; tempestivè objicitur: & aliquantò maturius, si maturè timetur altera sive accessio, sive exacerbatio; quo nempe loco est integritas, eodem est remissio. Certè quisquis mollissimo tempore, nec impeditæ, sed suis viribus utentis Naturæ commodo sordes corporis expurgabit; aget cum ea certissimum de morbo triumphum.

V.

TERGUM rationi obvertunt, qui crudescentem febrem velut in herba succisuri, paulò antequàm recurat, aut exacuatur, purgantem potionem ægris fidenter impingunt, ultimòque ærumnæ cumulo, si è Pharmacis validissimis fere virulentis conflatam. Fas quidem, exemplo rarissimo, obviam impuritatem in ipso corporis vestibulo oberrantem, exultantem, exundantem, nullisque repagulis continendam, sicut è stabulo lupum, protinus, quâ repit, ejicere, raptis etiam cum quadam temeritate remediis. Dum verò pejor fit æger, morbus vocat Naturam ad certamen, cæcus calor intrò receptus angustos aditus malignè claudit, fel ferox, intractabile, in intimo corporis penetrati conditum, & à Regiâ viâ femo-

tius inardescit, agitatum tumet, ignem veni ac præcordiis implicat, ruptisque velut caminis, fumantem & piceam expirat fuliginem, quæ cordi offusa, pulsum contrahit, vitæ commeatum intercipit; altius subblata, lethæo quasi rore madens cerebrum degravat; nemo, vel mentis obtusioris, speret fædi humoris cænum facili secuturum, iterque per medios ignes inventurum, secturum. Eâ re Medicus venit in culpam ægro luendam spiritu, vel ampliore, curandoque tristiùs morbo. Ad bi-
duum forte videbitur hic relevatus, & falso uterque ducetur gaudio, si quid fordium vi abreptum, casive è concussio corpore dejectum fuerit. At erit intus furiata illuvies, novos fluctus excitatura. Sed sit cui non malè aliquando verterit felix sic medentis audacia, non propterea istæc via præceps terenda; nihil enim nisi in quo extet iudicii ratio, rectum est.

Non ergo instante febrium excandescentiâ, accessione, purgandum.

DOMINI DOCTORES DISPUTATURI.

<i>M. Raymundus Vaslet.</i>	<i>M. Claudius Biendisent.</i>	<i>M. Carolus Baralis.</i>
<i>M. Gabriel Dacquet.</i>	<i>M. Dominicus de Farey.</i>	<i>M. Ioannes Antonius Bourgaud.</i>
<i>M. Claudius Berger.</i>	<i>M. Michaël Poinsart.</i>	<i>M. Germanus Hureau.</i>

Proponebat Lutetiæ ANTONIUS DE SAINT-YON,
Parisinus, A. R. S. H. MD CLXXI.

PARISIIS,

Ex Typographia FRANCISCI MUGUET, Regis &
Illustrissimi Archiepiscopi Typographi, viâ Citharæ.